

77
110- 4878
H A R A N G V E

FAICTE AV ROY

PAR LA ROYNE

M E R E.

22

9

M. DC. XXII.

THE
ALICE AV ROY
EMIL ROYNE
M. R. E.

*HARANGVE FAICTE AV
ROY, PAR LA ROYNE
Mere.*

IE ne sçay, Monsieur mon fils, si
ce qu'on estime auoir apporté
des changemens à tous les cœurs
de vostre Estat, a diminué quel-
que chose de l'apprehension que
i'auois de vous parler, de crainte
de vous desplaire, ou si vostre vi-
sage me monstre veritablement
vn esprit entierement desuelop-
pé des charmes des mauuais im-
pressions qu'on vous auoit don-
nees de moy : mais il me semble
comme ma langue commence à
se délier, que vos oreilles ne se
peuvent plus aussi fermer à ma
voix, & que tous mes sens sont ef-

galement ravis & satisfaits les vns
 des autres; Il est vray que les ap-
 proches de ceste douce reconci-
 liation me troublent encores, &
 me veulent tousiours faire voir
 autour de vous vne ombre qui me
 defend la parole; mais ie me re-
 fous en mon bon heur present, &
 me semble quand ie le considere
 apres vne lógue & dure souffran-
 ce que ie vien de vous mettre vne
 autre fois au monde: ceste grace
 qui feroit oublier toutes mes pei-
 nes passees, & ie n'en parlerois
 point, si ie ne croyois que mon si-
 lence me rendist aussi coupable à
 ceste heure qu'il m'est permis de
 parler, comme faisoit la parole
 alors qu'on m'imposoit le silence,
 à fin que les restes de ceste domi-
 nation ne renaissent de sa cendre.

par ma faute, & qu'à l'heureux retour de vostre bon naturel, ie vous laisse encores ceste satisfaction de reuoir vostre mere avec son innocéce, si vous estes du tout libre à iuger de ses intentions par les raisons & les necessitez de sa procedure. Les incertitudes que i'auois trouuee entre les Grands d'as la foiblesse de vostre bas aage, la crainte d'un corps formé dans l'Estat, qui l'a mis autrefois à la veille de sa ruyne, l'apprehension d'un estranger puissant & entreprenant qui y auoit tousiours contribué, & la preuoyance que i'auois mise à tout, sont les pretextes de ma condemnatio; ie vous laisse à les interpreter: mais ie ne considerois point tant mon desastre en mon bannissement & en ma prison, que les malheurs

qu'il le doivent fuiure: car ie voyois
 bien qu'on ne vous auoit rendu
 mes deportemens si odieux que
 pour de tres-grandes raisons, &
 pour ietter sur ma ruyne les fon-
 demens d'une monstrueuse puis-
 sance. Il est vray qu'il y auoit peu
 d'apparence à se persuader que
 ceux qui ne se cognoissoient il y
 auoit si peu de temps que parmy
 le mespris de la Cour, eussent de si
 hautes pensees; mais quand ie me
 representois que les traicts de leur
 premiere audace auoiēt porté co-
 tre la mere du Roy, iusques à la
 rendre en estat de coupable &
 preuenue de mort, si la miserable
 reserue de sa vie n'eust encores
 couuert quelques secrets de leurs
 desseins, qu'ils s'estoient emparez
 de vostre esprit & de vostre per-

sonne: que de honteux mendi-
 ans de repas ils engloutissoient tout
 d'un coup les millions, sans tes-
 moigner aucun soulagement à
 leur auidité: que de lasches & cō-
 muns complaisans ordinaires, ils
 s'esleuoient d'un plein vol par des-
 sus les Princes, & qu'ils portoient
 desia à l'alliance de vostre sang,
 sans que cela leur semblast trop,
 ny trop respectueux: ie dis alors
 que ceux qui se faisoient dès l'en-
 tree leur Prince & leur souuerain
 bienfaicteur leur compagnon, fe-
 roient bien tost leur Maistre leur
 esclau. Ces pensees ne me tom-
 boient pas dans l'esprit pourtant,
 par quelque deffiance que i'eusse
 de vostre courage, car ie scauois
 bien que vous teniez trop du sang
 genereux de vostre Pere, pour

succomber par ceste partie ; mais
 ie voyois que vostre extreme bôte
 s'estoit laissée preuenir par leurs
 artifices d'une si grande confiance
 que c'estoit aussi une necessité à la
 fin comme ils auoient desia abusé
 d'elle qu'ils abusassent aussi de
 vostre personne & de vostre Estat.
 Les mauuaises semences prennēt
 facilement & se hastent d'estendre
 leurs racines, de peur d'estre sur-
 prises en leur croissāce. Vous ne
 leur eustes pas si tost liuré vostre
 amitié, qu'ils tirerent vostre au-
 thorité à eux, & sans mettre diffé-
 rence entre vostre faueur & la
 puissance Royale, ils se firent en
 vn mesme instant, & fauoris du
 Prince, & Princes de l'Estat. Cela
 ne se pouuoit mediter, Mons.^r mon
 fils, qu'avec vne pernicieuse con-
 sequence,

sequence, parce que s'ils n'eussent
 eu l'ame atteinte que du seul de-
 uoir & de la seule amitié qu'ils de-
 uoient à la vostre, comme ils vous
 faisoient croire, ils se fussent esti-
 mez tous heureux sous la seule
 grace de vos inclinations, sans re-
 chercher vn autre heur & vne au-
 tre fortune dans l'vsurpation de
 vostre puissance: Et s'ils ne croy-
 oient pas que ceste amitié Royale
 fust assez pour des simples chas-
 seurs à louer, & s'il leur en demeu-
 roit quelque sentiment de discre-
 tion, qui ne passassent pas iusques
 au mépris, qui ne pouuoit se for-
 mer sans infidelité, il falloit pour
 le moins, que ce qu'ils desiroient
 pour l'appuyer fust limité de ce
 que vous leur pouuez donner au
 dedans de vostre maison pour les

maintenir auprès de vous, & non pas de tout ce que l'Estat pouuoit souffrir, & ne pouuoit souffrir pour dominer aussi bien dans l'Estat que dás vostre maison. Et puis s'ils eussent eu le moindre de ces bons mouuemés, ou si ceux qu'ils auoient n'eussent couué de la desloyauté, ils eussent aymé vostre autorité en vous, & ne vous l'eussent pas insensiblement soustraicte sous vne vaine ombre de descharge & de soulagement, pour en disposer par leurs seules deliberations. Il ne s'est iamais veu rien de plus monstreux, Monsr. mon fils, que de les voir passer ainsi du vol de la Crecerelle au gouuernement d'une si puissante Monarchie. Quelques autres eussent eu peur d'y faillir, scachant combien

tous ces grands changemens sont
dangereux, mais la seule hardiesse
qu'ils eurent en cest apprentissa-
ge tesmoignoit bien qu'ils ne se
soucioiét que d'establir leur puis-
sance, pour se rendre de seruiteurs,
aymez & necessaires, & de fauoris,
fauorables à leur Prince. Je ne
doute pas que vous n'ayez passé
par tous ces sentimens: du com-
mencement que vostre ieune cou-
rage ne se donnoit qu'aux incli-
nations de son aage, & que vostre
esprit estoit encor capable de tou-
tes impressions, eux qui estoient
eternellement attachez à toutes
vos heures & à tous vos momens,
& qui sçauoient que vostre natu-
rel estoit si bon qu'il ne faillloit
que peu de complaisance pour le
gagner, s'y sceurent assez bien

gouverner. Ceste entree leur fut ainsi fauorable, & voyant que la nouueauté vous en estoit aussi plaisante, ils s'imaginerent bien que vos considerations ne s'estendans pas à l'heure plus auant que vos inclinations, puisque vous leur donniez avec tant d'applaudissement les choses, comme si vous pouuiez estre sans conseil, le libre dispensateur de tout: en ceste premiere chaleur vous leur donneriez tout de mesme les choses de l'Estat: Et voila d'où sont venus les artifices de la conspiration qu'ils executerent contre moy, & la trame de tous mes malheurs, depuis qu'ils virent que ce premier coup leur auoit si bien reussi, dequoy eussent ils douté aussi? Ce ne fut pas assez d'auoir leuë le pre-

mier obstacle à leur ambition, pour s'approprier donc la puissance souveraine il falut casser, chasser, ou rendre muets tous les vieux ministres de vostre Estat, & aux plus puissantes charges en establir de nouveaux, pour se faire autant de creatures & de partis: Ils disposerent ainsi des pensions & des pensionnaires, ils ietterent en suite dans vostre esprit le soupçon de tous les Grands, afin de se faire voir les seuls en qui vous peussiez avoir confiance: Ils vserēt des premiers à leur mode, ils firent l'amour aux Principautez souveraines, ils demarierent les autres Princes, ils vous firent autoriser d'autres mariages iniustes, violēts & scandaleux, pour se faire Empereurs ou de leurs descendans, &

semerent en si peu de temps tant de mescontentemens dans vostre Royaume, qu'il falut qu'il y en eust vn esclat, il reussit encor à leur aduantage, car le vent impetueux qui souffloit dans les voiles de leur fortune, ne relaschoit point son haleine, & apres auoir ainsi tout remis, les loix, les finances, les places, les Prouinces & les Princes sous leur main & sous leurs pieds, ils voulurent triompher de vos armes. Je vous laisse à penser M. mon fils, si les ennemis ne deuoient pas craindre de voir l'espee de vostre cholere en vne main si guerriere? Cela ne laissoit pas pourtāt de monstrier d'autant plus le debordement de leur audace. Car l'on pouuoit bien dire de ceux qui auoient tousiours le tiltre de sou-

uerains dans l'ame, & qui par la conuenance ou le desguisement de leurs noms auoient essayé de s'approcher de la tige de nos Rois qu'ils en auoient des pensees certaines: iusques là vous ne sentistes point s'affoiblir les premieres violences de ceste passion de ieunesse que vous auiez pour eux; mais peu à peu comme ils virent tous ces succez si pleins d'allechemens, & toutes les faces de la grandeur qu'ils s'estoient proposees si riantes, les mauuaises pensees qui ont tousiours quelque chose qui ne se peut celer, leur firent changer de cœur; d'humbles & de complaisans, ils deuindrent vos familiers, iusques à de telles priuautez que des maris tant soit peu respectueux n'en voudroient pas vser de-

uant leurs femmes. Ce premier respect violé l'audace les surmontant peu apres, vos premieres tendresses se lassans aussi, vous commençastes à sentir tacitement leurs submissions se changer en maistrise, & vostre amitié ou faueur en necessité: Je vous laisse à repenser la dessus combien de fois ils ont fait des violences à vostre esprit par la consideration, & combien de gehennes & de tyrannies secretes ils ont exercees sur vos volontez, ils s'en aduiserent bien dès l'heure sans le feindre, & sçachans que ces passions si desmesurees quand elles ont vne fois commencé à descheoir ne remonter iamais, ils delibererēt d'y pourvoir. Il falloit pour cela des conseils bien extremes: ils auoient

peur

peur d'un costé que la paix les te-
 nans moins en consideration, fist
 aduancer vos refroidissemens, &
 de l'autre que la guerre n'appor-
 tast quelques autres grands chan-
 gemens non preueus; neantmoins
 voyant aussi bien qu'il ne leur fa-
 loit plus que le tiltre dont ils fai-
 soient les fonctions dans le Lou-
 ure mesme, & qu'ils ny pouuoient
 paruenir que par vn desordre ge-
 neral, sur l'appuy qu'ils auoient
 de leurs places, des intelligences
 qu'ils auoient practiquees en ap-
 paréce pour vous, dont ils estoient
 les maistres de la disposition de
 vos finances, & du commande-
 ment dans vos armées, qu'ils pou-
 uoient tousiours tenir liez les vns
 aux autres, ils porterent à la guer-
 re, le pretexte n'en estoit pas peu

specieux, parce qu'il faut aussi que
vostre autorité soit recogneue
absolue, ny l'entreprise n'en estoit
pas difficile à persuader à vostre
courage, mais s'il les falloit iuger
par toutes leurs autres procedu-
res, & par leurs monstrueux pro-
grez, ils voyoient encor plus loin,
qu'en trauaillant pour vostre
gloire ils trauailloient pour leur
ambition, & que pour vsurper il
falloit abbatre ce party, parce que
de trois il eut tousiours esté le plus
fort dans l'Estat, & quand il eust
esté mis à bas, toutes ces forteref-
ses espouuantables adioinctes aux
leurs, les Princes & tous les Grâds
morts ou sous leur domination,
vous mesmes n'en pouuiez escha-
per que par vn miracle nouveau:
leurs creances secretes & separces

des vostres dedans & dehors le Royaume, leurs pratiques factieuses principalement vers sa Sainteté, pour faire authentifier à Dieu (si l'on pouuoit parler ainsi) leurs conspirations & leurs violences, tant d'autres avec celles là dót vo⁹ n'avez peu encor voir que les soupçons, l'humeur de celuy qui leur inspiroit les conseils, bien que sa nourriture fust esloignée de toute grandeur, sa qualité de parent assez reconnue: Toutes ces circonstances qui sont autant de coniectures nécessaires, acheuoit bien de rendre ces profonds desseins plustost que le légitime pre-texte auteur de ceste guerre, & ie ne sçay si ie dois passer iulques là, que ce Dieu mesme qui est ialoux que la grandeur ne tombe qu'en-

tre les mains des Roys, en a voulu
 faire vn exemple. Ce ne sont pas
 mes penſees pourtant, d'aigrir d'a-
 uantage vos ſentimens contre ce
 qui en demeure, car en fin puis que
 les deſſeins ſont faillis, que l'Eſtat
 a changé de condition, & que ſon
 Roy eſt ſon maistre, ie ne ſçauois
 auoir pour moy de plus douce vé-
 geance que de n'en deſirer point:
 il me ſera bien plus fauorable d'en
 eſteindre la ſouuenance, de crain-
 te qu'elle ne me remette dans l'a-
 me les troublemens & la terreur
 dont elle eſtoit ſaiſie, quand ie me
 repreſentois que ie verrois encor
 reuenir à vos coſtez ceſte idole ef-
 pouuantable avec ſa reſolution de
 mettre la derniere main à mes in-
 fortunes: mais ie voy qu'il y en a
 d'autres qui ſe ſont releuez & for-

mez dás ce desordre, à qui ce chā-
gemēt & la liberté que i'ay de vo⁹
approcher donneront de grandes
alarmes, ils sçauent qu'ils ont eu
part à beaucoup de conseils pas-
sez, ie ne doute point qu'ils ne fa-
cent encores tout ce qui leur est
possible pour empescher que vo⁹
n'eschappiez du tout à leurs im-
pressions, de peur que passant à
des mouuemens du tout contrai-
res, vous ne renuerfiez sur eux vne
partie de vos ressentimens ; s'ils
cognoissoient mes intentions ils
en auroient moins de deffiance, &
ne croyroient pas que ma presen-
ce aupres de vous püst auoir d'au-
tres pensees que celles qui sont
deuës à la condition de mon sexe ;
non, non, qu'ils ne me l'enuient
point, ie ne l'enuie pas pour la

douceur qu'elle m'apporte, ny pour la troubler d'un soin désormais inutile avec le vostre. Et vous M. mon fils, si ce que j'ay creu dès le commencement est veritable, que vostre cœur n'est plus à ceux qui me l'auoient osté, pensez que le temps que les meres portent leurs enfans dans leurs entrailles ne leur dure que pour le grand desir qu'elles ont de les voir au monde, & que dès l'heure qu'elle les peuuent voir elles voudroiet que leurs yeux en fussent inseparables. Je diray pour eux, que ceux qui n'ont peu resister au torrent d'une fortune si rapide, n'en sont pas pour cela tous coupables, qu'ils disent pour moy que mon souuerain bien consiste donc en vostre amitié & en vostre veüe, & que

vous m'en deuez laisser iouyr:
 Ceux qui interessoient^e par tout
 leurs desseins ambitieux n'en peu-
 uent plus, celuy qui conseilloit
 tous n'a plus de voix, tous les
 cœurs sont remis à vous, & tous
 vos peuples fideles benissēt Dieu:
 si vous me laissez ce seul conten-
 tement qui me reste de viure au-
 pres de vous, ie n'auray plus de
 plus celebres pensees que de le
 prier aussi que vos conseils fassent
 re florir vostre autorité dedans &
 dehors le Royaume, vostre cou-
 rage vos armes, & Vous vostre
 Iustice.

F I N.

